

四庫全書

史部

欽定四庫全書

史部

欽定八旗通志卷

一百五十八至  
一百五十九

欽定四庫全書

欽定八旗通志卷一百五十八

人物志三十八

大臣傳二十四

滿洲正白旗三 齊塔 庫禮  
伊理布 蘇克薩哈 白爾赫圖

羅碩 莽奕祿 蘇納海 鄂泰 覺羅吉哈  
禮 達都

齊塔

齊塔滿洲正白旗人姓那木都魯和碩額駙康果

禮第四子也年十四授三等侍衛

太宗文皇帝天聰九年因其叔父喀克都哩欲逃瓦爾喀  
事覺坐黜罷崇德六年隨大軍圍明錦州擊松山  
杏山敵兵屢有斬獲明年冬隨貝勒阿巴泰征明  
越燕京趨山東攻新城高陽霸州壽光博興等城  
皆先登身中五創

賜人戶牲畜銀幣授前鋒侍衛

世祖章皇帝順治元年五月隨大軍討流賊李自成敗賊  
將唐通於一片石追擊自成至安肅望都十一月

授護軍叅領隨豫親王多鐸由河南征陝西連敗  
自成賊衆于潼關明年隨豫親王征江南攻克揚  
州取江寧追敗明福王朱由崧於蕪湖叙功予雲  
騎尉世職三年隨端重親王博洛征福建明唐王  
朱聿鍵遁汀州賚塔率兵破其城晉世職騎都尉  
五年明桂王朱由榔據湖南賚塔隨鄭親王濟爾  
哈朗往征六年四月師至衡州敗其總兵陶養用  
於青草橋又敗胡一青萬五千衆於府南山進克

祁陽由榔將周進唐於大忠橋拒敵擊敗之復斬其副將等於王公嶺一青旋與王進才各率馬步數千人拒於河岸亦敗潰賚塔進擊其總督譚宏於道州又擊一青及焦璉等於全州皆聞風竄遁七年八年兩遇

恩詔洊晉二等輕車都尉初喀克都哩獲罪康果禮之世管佐領亦坐革

太宗諭以後有報効仍准給還至是賚塔請於部得

旨復之即予賚塔承管十一年由榔將李定國犯廣東賚塔隨都統珠瑪喇等往征屢敗其兵解新會圍定國遁走追敗之興業及橫州叙功晉爵三等男十三年擢護軍統領十六年海賊鄭成功犯江寧

命安南將軍達素同賚塔率師往征至則賊已敗遁遂移師福建明年賚塔同都統索歡勦賊廈門官軍不習水戰失利

聖祖仁皇帝康熙元年論罪罷任革世職及佐領二年署

前鋒統領隨靖西將軍穆哩瑪征流賊李來亨等  
於茅麓山屢戰皆捷賊平凱旋復授護軍統領兼  
佐領八年擢正白旗蒙古都統十三年逆藩耿精

忠叛

命賚塔為平南將軍統兵赴浙江勦禦精忠賊黨犯金華  
賚塔遣副都統瑪哈達雅塔哩拉哈等擊走之復  
義烏及諸暨二縣賚塔進駐衢州偽都督周列率  
賊二萬由常山來犯賚塔遣副都統瑚圖等邀擊



於焦國擒斬過半偽總兵桑明旋以五萬衆犯衢  
州賚塔同總督李之芳遣兵迎擊復斬級萬餘十  
四年督兵擊敗偽將軍馬九玉等於黃潭口大鐵  
村王屋山坑埠南塘諸處偽副將李廷魁屯衢州  
城北元口山賚塔督兵乘夜攻圍破走之焚其木  
城九玉同賊將林福等退據大溪灘時康親王傑  
書為大將軍駐金華賚塔奉

詔叅贊軍務以分駐衢州仍佩平南將軍印屢擊卻來犯

賊衆十五年八月康親王進駐衢州賚塔循例歸  
將軍印以都統任叅贊先率兵馳擊大溪灘斷賊  
糧道復江山馬九玉潛遁九月賚塔同瑪哈達等  
率兵破仙霞關偽叅將金應虎降進拔浦城又同  
副都統吉勒塔布等敗賊於建陽克其城進復建  
寧府十月隨康親王抵延平精忠窮蹙感迎降時漳  
泉興化俱為海賊鄭錦所據十六年正月賚塔同  
寧海將軍拉哈達勒賊興化連破二十六營陣斬

偽總督趙得勝等復興化偽總兵郭維藩以仙遊  
降三月同拉哈達討叛鎮劉進忠於潮州進忠迎  
降康親王奏復授賚塔平南將軍印守潮州十七  
年四月鄭錦之偽總兵劉國軒陷平和犯海澄

上命賚塔移師赴援賊斷江東橋及長泰同安諸小徑我  
師弗克進六月賊陷海澄漳平同安惠安犯泉州  
九月賚塔與總督姚啟聖合兵進討大敗賊於蜈  
蚣山破其七營斬四千餘級復長泰十月復敗賊

於漳州萬松關十八年偽將軍吳淑何祐等犯長  
泰賚塔同提督楊捷等分道進擊斬二千餘級生  
擒偽總兵副將三人劉國軒復犯江東橋賚塔迎  
擊敗之賊走太平寨追斬千餘級十九年二月同  
姚啟聖楊捷等勦賊海澄招降偽總兵蘇堪復其  
城聞水師提督萬正色已取海壇賚塔由松嶼進  
征偽將軍陳昌率衆迎降鄭錦遁臺灣廈門金門  
相繼定四月調本旗滿洲都統仍為平南將軍守

潮州尋奉

命移駐廣州會尚之信獲罪逮繫其藩下長史李天植等  
怨都統王國棟發難誘殺之藩兵咸畏罪思亂賚  
塔密承

詔旨以罪不株連慰撫藩兵自率兵圍之信第收捕天植  
及同謀者繫獄候

旨餘釋勿問時逆孽吳世璠尚據雲南定遠大將軍貝子  
彰泰自湖南進征貴州

上以賚塔在福建廣東勞績素著授為平南大將軍赴廣  
西調遣滿漢兵由南寧直進雲南賚塔遂率兵由  
田州泗城進西隆州偽總兵周應龍迎降偽將軍  
何繼祖等擁賊數萬於石門坎築壘拒敵石門坎  
者距安籠所三十里地峻隘稱天險賚塔令都統  
勒貝希佛瑪奇護軍統領額赫訥等率師直前自  
與副都統宏世祿赫呀布總督金光祖分兵為二  
由間道躡其後二十年正月度賊無備飭前軍進

攻賊倉卒出禦後軍履險上前後夾擊大敗賊衆  
奪其隘口進復安籠所城降偽總兵陳義魁繼祖  
復糾偽將軍詹養王有功等率二萬人據黃草壩  
列象拒戰二月二日賚塔督兵奮擊自卯至未奪  
賊營二十二生擒詹養王有功及賊衆千餘獲其  
象馬

上以賚塔自廣西深入雲南獨先諸路大敗逆賊

溫旨嘉獎師抵曲靖降偽總兵尹士元偽道員劉世忠等

隨遣兵取霑益州斷賊中路偽將軍線絨等皆遁  
歸分遣希佛瑪竒等復馬龍州易龍所及楊林城  
營總碩塔等克嵩明州其他賊營聞風解散遂會  
合彰泰軍駐營歸化寺偽將軍胡國柄劉玘龍等  
離城拒戰賚塔與彰泰分兵進擊自卯至酉賊大  
潰斬國柄玘龍及偽總兵九生擒賊六百餘逆孽  
吳世璠嬰城守陰調賊將馬寶胡國柱夏國相等  
還救大軍并力環攻賊內亂欲擒世璠出獻世璠



自殺線絨等開城降遂磔偽大學士方光琛等於  
軍前戮世璠屍傳首京師夏國相竄廣南賚塔與  
彰泰檄土官儂朋總兵李國標率師追勦擒之西  
板橋又遣希佛等追勦胡國柱於雲龍州國柱繼  
其黨王叙李匡自焚餘衆悉降雲南平二十一年  
十月大軍凱旋

上親率諸王大臣郊勞於蘆溝橋西二十里外

御黃幄

召彰泰賚塔行抱見禮還京仍任都統二十二年以隱匿尚之信藩下應入官婦女事覺應勘問

上曰賚塔自福建廣東至雲南宣力勤勞樹立大功勿因微細事遂以非禮加之致失朕眷顧功臣之意下所司

集賢得實請革職治罪

詔從寬削級罰俸明年十二月卒

予祭葬如典禮加祭二次謚襄毅二十四年六月

上諭王大臣等曰平定雲南賚塔之功最大縱有他過為

人訐告朕究不加罪諸臣曰

皇上俯念賚塔有功曲賜保全不特効力行間者皆歡忻  
鼓舞即臣等亦莫不感戴二十五年追叙其功予  
一等男爵子費葉楞襲雍正五年八月

世宗憲皇帝諭曰原任都統賚塔當三逆變亂時統兵征  
勦克復雲南功績懋著朕恭閱

聖祖仁皇帝實錄備悉其詳因伊身有過犯功過相抵是  
以未封公爵止授一等男在當日之不優封賚塔者欲

使立功之人咸知儆惕收歛不可恃功驕肆妄為今事  
歷多年後人已知鑒戒奉法着追封賚塔一等公令伊  
孫博爾屯承襲以示朕眷念舊臣之意八年始建賢良

祠

語以賚塔與大學士圖海等並入祀九年加公號曰褒績

庫禮

庫禮滿洲正白旗人姓喜塔臘

國初有昂果都理巴顏者來歸其四世祖也庫禮逮

事

太宗文皇帝崇德初朝鮮臣服歲以兵從我師征討庫禮

嘗奉

命統其軍五年睿親王多爾袞等征明圍錦州

上遣戶部叅政碩詹徵朝鮮水師五千及米萬斛赴大凌

河濟師庫禮與副都統洪尼喀率三十人導其舟

以行明年復隨鄭親王濟爾哈朗圍錦州克其郭

斬八百餘級復同前鋒統領薩穆什喀攻松山北

崖庫禮率朝鮮兵二百餘人奮勇先登克馬有科  
爾沁降明蒙古兵來犯礮傷庫禮手不為動卒與  
朝鮮兵併力破敵從攻松山敵襲我正紅鑲藍二  
旗汎地庫禮同左翼將領勒卜忒擊退其衆斬獲  
甚多

上嘉其功

賞所獲牲畜授騎都尉世職七年擢戶部叅政

世祖章皇帝順治元年改定官制庫禮仍任戶部侍郎以

聽從豫親王多鐸擅集視八旗女子論罪輸罰鍰  
二年叙克燕京功加一雲騎尉尋奉

命往淮安總理漕儲四年九月鹽城土賊潛訶庫禮會漕  
運總督楊聲遠親往撫慰民心始定無何賊渠周  
文山等率其黨八百餘人夜襲淮安從夾城東門  
缺口突入逼庫禮衙署庫禮率中軍張大治旗鼓  
王國印暨帳下數十人挺身迎擊發矢揮刃大呼  
殺賊其妻恚出署中所存箭使僕婢齎送助戰衆

皆一以當百自丑至辰斬殪甚衆賊大驚奔潰復  
追斬百八十餘級盡收其偽印劄兵械等淮城獲  
全賊渠偽益王朱隆武者時襲據廟灣城糾醜徒  
數千船百餘乘間將窺淮庫禮與楊聲遠等議曰  
賊勢橫非出奇設伏不足致其死命乃遣兵分布  
要害賊謂無備也方揚帆直上至車家橋伏發步  
騎四起水陸蹂躪賊被刃及溺死者過半獲偽印  
劄及舟楫器械無算餘遁歸廟灣庫禮復集衆議



以都統張大猷巡撫陳之龍分統水陸官軍直趨  
廟灣羣逆望風竄匿于是次第勦撫劉莊塢等十  
巢旬日之內根株肅清鹽城廟灣民各復業事聞  
得

旨嘉獎以考滿晉三等輕車都尉未幾回戶部侍郎任七  
年乞休

予致任累遇

恩詔晉世職一等輕車都尉又一雲騎尉尋卒

賜祭墓如典禮諡僖恪子堯泰襲

伊理布

伊理布滿洲正白旗人姓他塔喇三等伯阿濟格  
尼堪長子也崇德三年任兵部副理事官順治八  
年襲父爵兼管佐領兩遇

恩詔晉一等伯十七年任刑部侍郎明年調吏部是時海  
賊鄭成功據臺灣四出劫掠有言瀕海居民宜移  
之內地者伊理布奉

命同尚書蘇納海赴江南浙江福建會勘疆界定議還京  
擢正白旗蒙古都統康熙二年

命赴廣東會同總督盧崇峻察勘海疆新移人戶俾安輯  
得所七年調本旗滿洲都統旋列議政大臣十二  
年冬逆藩吳三桂反十三年

上命順承郡王勒爾錦統師進討以伊理布恭贊軍務既  
至荊州三桂據常德臨松滋襄陽總兵楊來嘉副  
將洪福叛附三桂於穀城鄖陽間據山結寨窺伺

郡邑

詔伊理布守宜昌十四年來嘉等犯南漳順承郡王承

制授伊理布討逆將軍印偕副都統根特往援賊遁旋犯

均州營于武當山下伊理布麾兵連戰陣斬偽副

將叅將及賊兵千餘賊潰走已而三桂于松滋北

山屯聚賊數千沿江日增戰艦將合水陸來犯

上命伊理布同都統范達禮防守襄陽均州南漳諸處賊

將張以誠王會聯結來嘉等復寇南漳伊理布同

總督蔡毓榮分率勁旅夾擊大破之斬三千餘級  
獲偽劄器械無算十六年奉

詔率荆州防兵同征南將軍穆占由岳州進長沙恢復茶  
陵賊遁入攸縣伊理布率兵追勦賊據河岸拒戰  
我兵奮進斬四千餘級生擒百餘人克復攸縣城  
十七年四月穆占統兵復郴州永興桂陽興寧遂  
自駐郴州以伊理布守永興六月三桂遣賊將馬  
寶胡國柱等逼永興犯我河外營伊理布率兵禦

擊歿于陣十八年喪還

上遣內大臣奠茶酒復

遣侍衛傳

諭其母曰伊理布時侍朕前深悉其人及出師著有勞績方謂成功之後即可凱旋相見忽聞陣歿不覺悽愴痛悼茲聞爾家費用不給特賜白金六百兩為治喪資

賜祭葬如典禮諡武壯立碑墓道子阿什坦襲爵

世宗憲皇帝時以伊理布入祀昭忠祠

蘇克薩哈

蘇克薩哈滿洲正白旗人姓納喇額駙蘇納長子也初委署佐領崇德六年隨鄭親王濟爾哈朗等圍錦州明人出步騎接戰敗之

太宗文皇帝聞明總督洪承疇以師十三萬赴援

親帥大軍環松山列營敵兵遁走蘇克薩哈同護軍統領漢岱追敗其衆於塔山翼日復追擊明兵於海岸

隨豫親王多鐸等設伏襲擊與漢岱追斬杏山兵  
之潛遁者順治二年叙功授騎都尉世職尋晉三  
等輕車都尉七年

世祖章皇帝念蘇克薩哈父蘇納在

太祖

太宗時屢著功績繼因隱匿丁壯削世職三等輕車都尉  
至是

特旨復蘇納世職以蘇克薩哈併襲為三等男八年任議



政大臣九年兩遇

覃恩晉爵一等男加一雲騎尉初蘇克薩哈隸睿親王多  
爾袞屬下既而睿親王薨於獵所蘇克薩哈與王  
府護衛詹岱等舉首其殞殮服色違例及謀遷永  
平諸逆狀

命諸王大臣質訊皆實遂論睿親王如謀逆律是歲擢鑲  
白旗護軍統領十年孫可望聚衆犯湖廣蘇克薩  
哈奉

勅同都統辰泰等率禁旅出鎮湖南與經畧洪承疇會商  
進勦十二年明桂王將劉文秀盧明臣馮雙禮等  
分兵犯岳州武昌蘇克薩哈伏兵邀擊大敗之明  
臣等復縱艦拒戰又擊敗之文秀引兵趨常德戰  
艦千餘蔽江而下蘇克薩哈指揮軍士奮勇截擊  
明臣等悉衆抗禦我軍協力撲勦六戰皆捷縱火  
焚其船斬獲無算明臣赴水死雙禮被創遁降其  
副將等四十餘人文秀走貴州明年叙功晉爵二

等子任領侍衛內大臣加太子太保十八年正月  
與索尼及遏必隆鰲拜等受

顧命為輔政大臣奉

聖祖仁皇帝嗣統是時索尼為

四朝舊臣遏必隆鰲拜皆以公爵先蘇克薩哈為內大臣

鰲拜尤功多意氣凌轢人多憚之蘇克薩哈以額  
駙子入侍

禁廷承

恩眷奉

遺詔輔政名亞索尼與鰲拜稱媼婭而論事多與鰲拜選積以成讐索尼亦惡蘇克薩哈會鰲拜欲令鑲黃旗與正白旗互易屯莊索尼贊成之遏必隆弗能止遂行圈換之令旗民皆弗便康熙五年大學士兼管戶部尚書蘇納海坐撥地遲悞總督朱昌祚等坐紛更阻撓罪皆論死

上覽部議

召詢輔臣咸曰宜如議獨蘇克薩哈不對

上因不允所請鰲拜卒矯

詔並予棄市未幾索尼死鰲拜益驕恣蘇克薩哈慮其逼已也居常怏怏六年

上親政

諭部議加

恩輔臣以示酬庸之典越日蘇克薩哈奏言臣才庸識淺

蒙

先皇帝眷遇拔授內大臣早夜悚懼恐負

大恩當

先皇帝上賓之時惟願身殉以盡愚悃不意恭承

遺詔臣名列於輔臣之中分不獲死以蒙昧餘生勉竭心

力冀圖報稱不幸一二年來身嬰重疾不能始終

効力於

皇上之前此臣不可逭之罪也茲遇

皇上躬親大政伏祈

睿鑒令臣往守

先帝陵寢如綫餘息得以生全則臣仰報

皇上泰育之微忱亦可以稍盡矣疏上有

旨諭議政王貝勒大臣曰蘇克薩哈奏請守

陵如綫餘息得以生全不識有何逼迫之處在此何以不  
得生守

陵何以得生其會議具奏王貝勒等以大臣怨望奏請逮

治鰲拜與其黨大學士班布爾善等謂蘇克薩哈

不欲歸政文致之構罪二十四款坐奸詐欺飾存蓄異心論如大逆應與其長子內大臣查克旦皆磔死餘子侍衛穗黑塞黑里郎中那賽塞克精額達罷德器孫侷克札兄弟之子圖爾泰海蘭皆斬決藉沒族人前鋒統領白爾赫圖侍衛額邇德烏爾巴亦皆斬決獄具入奏

上知鰲拜素與蘇克薩哈有隙是以構成罪款必欲置之

重典



諭以核擬未當不許所請鰲拜攘臂

上前強奏累日卒坐蘇克薩哈處絞餘悉如議八年五月

鰲拜既敗

特諭吏兵二部曰蘇克薩哈雖有罪不至誅滅子孫此皆

鰲拜挾讐滅其後嗣深為可憫白爾赫圖等無罪誅戮殊為冤枉其蘇克薩哈及白爾赫圖等官俱應給還七

月復蘇克薩哈原官及世爵二等子

命其幼子蘇常壽承襲

白爾赫圖

白爾赫圖滿洲正白旗人姓納喇初由前鋒校授兵部副理事官崇德五年隨睿親王多爾袞圍明錦州敵出城犯我左翼白爾赫圖同前鋒叅領鄂碩戰卻之復擊敗杏山敵騎六年同前鋒統領武拜叅領瑚密色等屢擊敗明總督洪承疇兵於松山杏山間七年春自錦州分兵畧寧遠獲牲畜八年任前鋒叅領順治元年大兵入山海關討流

賊李自成白爾赫圖擊敗偽總兵唐通於一片石  
既定燕京追賊安肅及望都並多斬獲復隨豫親  
王多鐸西勦自成連破賊營攻克潼關二年移師  
江南徇蘓州擊走明巡撫楊文驄獲其船二十餘  
進征杭州擊敗明大學士馬士英之衆分兵徇湖  
州同前鋒侍衛安泰圖色等以雲梯克其城三年  
隨端重親王博洛征金華敗賊衆於八步嶺進定  
福建五年隨鄭親王濟爾哈朗征湖南時明桂王

朱由榔將王進才馬進忠袁宗第等分踞寶慶武岡六年白爾赫圖率本旗前鋒破之湘潭進征寶慶同副都統拜音岱等克其東門城外有九營合兵來犯白爾赫圖擊之潰溺水死者無算尋自武岡征沅州屢敗進才進忠宗第等進定全州七年凱旋得

優賚八年隨都統阿喇善征山東土賊至沂州攻圍蒼山賊寨斬賊首劉遜張齊又搜勦附近山寨斬賊首

趙三元楊大成應科等九年改護軍叅領先是  
叙山海關暨浙江福建軍功予世職騎都尉兼一  
雲騎尉及三遇

恩詔洵晉一等輕車都尉十三年擢前鋒統領十五年隨  
信郡王多尼征貴州時由榔據雲南以其將李定  
國白文選劉正國竇名望等扼據貴州要隘大兵至  
安莊衛劉正國以衆迎戰白爾赫圖同護軍統領  
布葉錫禮擊敗其衆斬正國於響水橋導大兵渡

盤江進克雲南城十六年白爾赫圖領所部進攻  
玉龍關白文選引遁追擊敗之獲其鞏昌王金印  
象三馬百有四十擒總兵呂三貴大兵取永昌府  
渡潞江李定國設伏磨盤山我前鋒既深入伏起  
白爾赫圖下馬據石立連發三矢斃賊三人賊駭  
潰我軍繼進合擊殲之竇名望據木柵拒守白  
爾赫圖率衆破柵斬名望遂取騰越州由榔定國  
文選皆遁追逐踰南甸而還信郡王班師白爾赫

圖同都統卓羅留駐雲南定國既竄出邊屯孟良  
復圖入犯約降將高應鳳為內應以由榔印劄誘  
元江土司那嵩倡叛白爾赫圖同卓羅率兵往勦  
敗賊於磨隴口進圍元江城掘壕困之越月城乃  
拔那嵩自焚死擒應鳳斬於軍十七年以在滇久  
著勞績

頒賜衣服白金鞍馬十八年九月隨定西將軍愛星阿勒  
由榔於緬甸十一月會師木邦聞白文選屯錫箔

江邊白爾赫圖同都統果爾欽遜塔等簡精銳先發至則文選已毀橋遁乃結筏以濟大軍次舊挽坡愛星阿令白爾赫圖率前鋒百人往蘭鳩江濱取緬人所獻由榔及其親屬至軍中大軍凱旋康熙元年四月白爾赫圖奉

詔同都統卓羅率前鋒軍先還京叙功晉爵一等男六年輔政大臣蘇克薩哈為鰲拜構陷株連族人白爾赫圖蘇克薩哈族弟也削官爵坐斬八年



上親政以白爾赫圖無罪枉坐追復原官及一等男爵以  
其子白爾肯襲爵十年其子一等待衛羅鐸叅領  
塞赫等訴陳白爾赫圖征雲南功多為鰲拜屈抑  
未予優叙得

旨下部議晉爵三等子並

賜葬祭如典禮諡曰忠勇

羅碩

羅碩滿洲正白旗人先世居棟鄂以地為姓祖魯

克素

國初來歸管佐領羅碩初任刑部理事官順治元年  
從睿親王多爾袞入山海關破流賊李自成追至  
望都縣二年叙功予雲騎尉世職六年四月以叅  
領同副都統卦喇領兵駐防太原時姜瓖叛黨攻

臨汾洲

諭固守太原勿輕進勒汾州迺於城南八十里立營徐溝  
清源二縣境扼賊使毋薄城賊攻破清源城羅碩

與卦喇分路擊之賊棄城遁陣斬五千餘人五月  
賊擁衆犯太原據晉祠堡立柵羅碩隨端重親王  
博洛衝破賊營斬首萬餘級八月賊首雷和尚張  
五等糾衆萬餘圍絳州復大破之斬級二千餘又  
破賊首胡邦秀石滋龍湯平等於浮山縣南之老  
君廟斬首千級得

旨獎叙八年三月擢任工部侍郎八月轉吏部九月復調

工部以三遇

恩詔加至二等輕車都尉九年隨敬謹親王尼堪征湖南  
失利十二年議罪革一騎都尉解侍郎任罰鍰尋  
授大理寺卿十七年追尊

端敬皇后禮成以

皇后伯父晉世職一等輕車都尉康熙四年卒第三子舒  
敏第三孫伍泰分襲羅碩長孫鄂爾多康熙十  
二年由侍衛擢刑部右侍郎十四年轉左十八年  
吏部考察以不謹革職

命從寬降二級隨旗上朝尋以恭領隨征湖廣四川二十三年復任刑部侍郎是年調戶部二十五年授內務府總管二十六年擢兵部尚書明年調戶部二十八年五月轉吏部尚書三十年七月

暢春苑奏事出得痰疾

遣御醫調治

賜御用衣服人役並派侍衛護送至家踰時卒

賜祭葬如例謚敏恪

莽奕祿

莽奕祿滿洲正白旗人初隸鑲白旗姓富察世居

葉赫曾祖阿布岱

國初來歸授騎都尉莽奕祿於順治元年六月襲職  
七年九月屢遇

恩詔洊晉二等輕車都尉十一年以署叅領隨靖南將軍  
珠瑪喇征廣東明桂王朱由榔將李定國糾步騎  
四萬據新會縣之山峪列礮象拒戰我軍奮擊之

潰奔別將以四千衆自山頂馳突我兵又敗之奪  
山隘定國遁師還叙功晉世職一等康熙元年授  
護軍叅領十三年逆藩吳三桂叛莽奕祿署護軍  
統領隨征湖廣十五年三月由石首縣進軍太平  
街賊八千餘拒戰莽奕祿同護軍統領伊勒都齊  
夾擊敗之斬百餘級賊遁回營復隨貝勒察尼分  
兵夾擊陣斬三百餘十七年五月擢鑲白旗蒙古  
副都統十九年十一月隨征南將軍穆占進貴州

恢復靖遠清平及平越府時逆孽吳世璠據貴陽  
偽將軍韓天福據新添衛莽奕祿與前鋒統領薩  
克察巴圖魯等領驍騎擊敗之殪賊千餘追奔三  
十餘里乘勝復龍里縣進薄貴陽吳世璠遁遂克  
之并復威清敷勇平壩鎮西等衛及定番州城二  
十年正月進軍平遠州賊偽將軍高起隆夏國相  
王永清楊應選張足法儂朋王會等擁衆二萬據  
城西南山拒戰莽奕祿與副都統花色等統前鋒



護軍奮擊敗之殺賊四百餘遂攻城自午至酉再  
敗賊斬級千餘于是王會降高起隆等遁招撫偽  
官三百四十四兵三千七十復平遠三月同遊擊  
王成功領兵四千追勦逸賊張足法等賊倚山拒  
戰我軍連奪三山賊敗走邀奪高家橋陣斬千餘  
人墜崖死者無算旋收復黔西大定諸城擒偽巡  
撫張維堅等斬之均得

旨議叙遂入雲南會大將軍賚塔軍於曲靖擊敗賊圍省

城八月調滿洲副都統並

命叅贊軍務十一月吳世璠自殺雲南平還京共得功牌

五叙不及職二十二年四月遷護軍統領管佐領

二十三年九月遷蒙古鑲白旗都統二十四年十

月調滿洲都統三十年十月授荊州將軍三十九

年十一月調荊州滿洲兵二千勦打箭爐蠻

上以莽奕祿年老

命留鎮荊州以副都統珠滿阿際禮領兵往四十二年二

月以老乞休

允之六月

上幸塞外莽奕祿赴

行在請

安

賜御書引年老將額

御衣一襲東珠頂帽孔雀翎入內大臣班八月卒年七十  
諭曰莽奕祿才品優長簡任將軍實心効力勤勞最久茲

聞溘逝深為軫惻下部議卹

賜祭葬如例諡敏肅子色爾敏例襲騎都尉兼一雲騎尉

六十一年十一月

世宗憲皇帝御極

恩詔下部察奏舊日出征八旗官兵因少一功牌未叙職  
者

特追授莽奕祿雲騎尉世職並擢入正白旗

蘇納海

蘇納海滿洲正白旗人姓他塔喇岱圖庫哈里之  
曾孫也初為睿親王多爾袞護衛

世祖章皇帝順治三年正月授宏文院學士

命隨肅親王豪格討流賊張獻忠十一月獻忠滅王令蘇  
納海先還奏捷六年隨英親王阿濟格討大同叛  
鎮姜瓖偽總兵楊振威等斬瓖首以獻王亦令蘇  
納海馳奏

上即命往軍中宣

恩諭仍隨英親王還京七年以繙譯三國志告成  
賚鞍馬銀幣兩遇

恩詔授世職騎都尉兼一雲騎尉尋以

甄別各官濫邀世職削雲騎尉九年正月

詔重修

太宗文皇帝實錄充副總裁官十一月

盛京總管葉克舒奏獲朝鮮國越界採獲之人

命蘇納海同副都統瑚沙携其人往朝鮮

勅國王李湜會鞠明年三月還京以湜陪臣至齎表謝罪  
附貢方物是年擢吏部侍郎十一年同尚書巴哈  
納侍郎額爾德等分賑畿輔十二年兼任鑲紅旗  
滿洲副都統十三年戶部援

恩詔赦免員外郎朱世德虧缺河西務額稅世德官如故  
吏部亦弗置議得

旨詰問乃以世德應褫職逮訊覆奏部臣坐瞻徇降革有  
差蘇納海罷任革世職逾月

上以蘇納海舊在內院練習院務起授國史院學士尋充  
經筵講官遷禮部侍郎十六年加太子少保十七年  
擢工部尚書旋調兵部是時海賊鄭成功據臺灣  
四出劫掠有言瀕海居民宜移之內地者蘇納海  
同侍郎伊里布奉

命赴江南浙江福建會勘定議

聖祖仁皇帝即位擢國史院大學士康熙二年兼管戶部  
尚書事五年輔政大臣鰲拜與蘇克薩哈有隙鰲



拜因已隸鑲黃旗蘇克薩哈隸正白旗欲以正白旗屯莊改撥鑲黃旗而別圈民地給正白旗使旗人訴情以牒戶部蘇納海持不可謂旗人安業已久民地曾奉

諭不許再圈宜罷議鰲拜銜之矯

旨遣貝子溫齊等履勘旋以鑲黃旗地不堪耕種疏

聞遂遣蘇納海會同直隸總督朱昌祚巡撫王登聯經理其事昌祚登聯交章言兩旗人較量肥瘠相持不

決而旗地待換民地待圈所在荒廢不耕農人環  
訴失業請停止圈換之令蘇納海亦以屯地難於  
丈量候

明詔進止鰲拜遂擅坐蘇納海藐視

上命遲悞撥地械付刑部議罪部議律無王條應鞭百籍  
沒家產

上覽疏知鰲拜以蘇納海始終不阿欲置之死

召四輔臣詢問鰲拜極言情罪重大索尼遇必隆附和之

獨蘇克薩哈不對

上仍以部議不按律文弗允鰲拜出矯

旨即予處絞八年

上親政以鰲拜罪惡衆著

命逮治於是議政王大臣等列狀入奏因及誣陷蘇納海  
事鰲拜既伏罪

上諭部臣曰朕閱處分蘇納海原案由鰲拜等以撥地遲  
延遽行逮問多端文致誣陷不按律文任意處死冤枉

可憫宜予恩卹於是

賜祭葬如例諡曰襄愍尋以其子瓦爾達為三等侍衛

鄂泰

鄂泰滿洲正白旗人姓瓜勒佳世居蘇完地方

國初來歸順治四年以兵丁從征百戶所首登城克  
之叙功授雲騎尉尋晉騎都尉七年復以從克江  
西九江府登城有功晉二等輕車都尉

賜巴圖魯號九年授

盛京禮部理事官緣事革職嗣授叅領康熙十年授  
盛京副都統十三年十二月陝西提督王輔臣叛定

西大將軍貝勒洞鄂奉

命討之

詔鄂泰率盛京兵一千來京備調十四年二月

諭曰陝西沿邊有路通山西汾州恐逆賊乘隙來犯其授

鄂泰為建威將軍統領自盛京調來兵一千往駐太原

防守汾州諸處四月

命由太原赴西安叅贊軍務其建威將軍印以副都統烏丹代時輔臣陰通川賊八月鄂泰偕署副都統阿爾瑚駐寶雞縣扼棧道十月川賊李冉二姓出棧道犯九龍山鄂泰與阿爾瑚督擊盡殪之會偽總兵任德望等率賊衆及猓猓七千餘來援至益門鎮屯營七鄂泰等分兵九路衝擊自已至未盡破賊營陣斬賊將徐姓德望以百騎遁驍騎校韓楚漢射中其股降之斬獲甚衆十五年三月復搜捕

餘賊於紅崖堡

詔獎其功下部議叙十八年鄂泰卒二十五年追叙軍功授騎都尉兼一雲騎尉世職以其子鄂山襲

覺羅吉哈禮

覺羅吉哈禮滿洲正白旗人武功郡王禮敦第二世孫也

世祖章帝順治四年七月錄武功郡王後嗣授吉哈禮佐領尋襲其父阿賚騎都尉世職遇

恩詔晉至二等輕車都尉兼任護軍叅領

聖祖仁皇帝康熙八年六月擢鑲黃旗滿洲副都統十二

年十二月逆藩吳三桂反奸民楊起隆乘機作亂

詐稱朱三太子廣德元年中興官兵以白布裹頭

紅布披身為號約於京城內外放火舉事潛聚鼓

樓西街已故降將周全斌家全斌之子公直首於

正黃旗漢軍都統祖永烈永烈與正黃旗滿洲都

統圖海偕吉哈禮及佐領鄂克遜等率兵圍之生



擒其偽齊肩親王焦三偽護駕指揮朱尚賢偽閣  
老張大偽軍師李柱偽總督陳繼志偽提督史國  
賓偽黃門官王鎮邦等送法司鞫實磔於市互詳  
圖海鄂克遜傳十九年九月

命同副都統席布率每旗前鋒三十每佐領下護軍一漢  
軍二驍騎三內府佐領下兵六百赴四川會同鎮  
安將軍噶爾漢勦賊十一月即軍前擢鑲黃旗蒙  
古都統時逆孽吳世璠據滇黔其賊將胡國柱夏

國相馬寶等分犯瀘州叙州及建昌二十年三月  
上以宣威將軍鄂克濟哈久駐成都致建昌陷賊令解任  
以吉哈禮代為宣威將軍統其所部兵馳會勇畧  
將軍雲貴總督趙良棟勦賊建昌五月吉哈禮疏  
言將軍趙良棟統綠旗官兵自雅州前進臣盡率  
所部兵繼其後因現在糧少騎兵止齋二十日糧  
步兵止齋十五日糧請

諭趣運送接濟從之六月吉哈禮同趙良棟率兵擊賊大

渡河奪賊船濟師胡國柱等聞貴州廣西大軍已  
並進雲南合圍省城引賊衆歸援吉哈禮收復建

昌奉

詔進征雲南互詳趙良棟傳九月吉哈禮行至武定府疾  
卒於軍年五十有六

賜祭葬如例子吉斯哈襲二等輕車都尉

達都

達都滿洲正白旗人先世居那木都魯以地為姓

世祖章皇帝順治四年由筆帖式授吏部副理事官八年  
恩詔予騎都尉職十二年四月疏言

皇上大開言路在京七品以上官員咸得進奏則兵民何  
以綏輯糧賦何以充足邊疆盜賊何以捕滅各抒  
所見可也乃御史張嘉以添設滿洲關差致多擾  
累為言又不指明何地關口何人害民何民被勒  
多取徒以向無而添設既撤而復行謂不足取信  
天下其意不過以關有滿官則官民貸船不徇情

面一體徵稅故獨忌滿洲偏私顯著今天下雖定  
邊患未寧總督巡撫布政使責任甚重必當仍用  
舊人俟太平日久不分新舊一體任用謹陳管見  
以

聞下部議關稅滿漢兼差督撫九卿科道會推布政使新  
舊一體論俸陞轉應俱如定例行妄奏之張嘉隆  
一級調用六月擢吏部郎中十三年四月因河西  
務鈔關員外郎朱世德虧課一萬三千餘兩照戶

部議援

恩赦免罪吏部諸臣並坐瞻徇達都革騎都尉降本部員

外郎十八年遷刑部郎中

聖祖仁皇帝康熙二年隨都統穆里瑪出征湖廣署叅領  
勦滅流賊餘黨李來亨等于茅麓山明年師還議  
初領隊時失利退還不殿後禦賊致損隊伍及登  
山墮崖自傷右脇詭稱為滾石所中應革職籍沒  
鞭責得

旨寬免籍沒披甲軍前効力六年復用為刑部郎中八年  
二月遷光祿寺卿十一月授秘書院學士十二月

充

世祖章皇帝實錄副總裁九年十月改保和殿學士兼禮

部侍郎十年二月充

經筵講官十一年七月

實錄告成加一級食一品俸十一月擢戶部右侍郎十三  
年六月大軍勦逆藩耿精忠達都奉

命往浙江督餉文官布政使武官副將以下俱聽節制鑄  
給總理大兵糧餉兼管地方兵馬一切事務印八  
月疏言浙省舊設杭嚴巡道嘉湖守道金衢守道  
各轄二府康熙六年裁併杭嘉湖為一道金衢嚴  
為一道在平時可節冗費今大兵雲集軍務繁劇  
一道管理三府未能兼顧請如舊各管二府仍分  
設杭嚴道以便料理錢糧軍需疏下部議如所請  
行十月疏言原任建寧府通判何源濬前以朝



覲回閩于今年三月過浦城縣一百二十餘里聞耿精忠  
叛亂賊兵已陷建寧從役勸其姑往投順收集家  
口誓死不從妻子親丁盡拋棄賊寨徒步七日行  
一千二百餘里至杭州請兵其忠貞可嘉曾經巡  
撫田逢吉疏

聞部議暫留浙省俟福建恢復仍赴原任現已羈縲半載  
無任可赴無俸可支似堪憐憫請與叙用得

旨何源濬聞耿逆變亂拋妻子徒步請兵深為可憫下部

優叙以浙省知府擢用十一月田逢吉因疾解任  
詔授達都浙江巡撫達都疏言巡撫事繁責重浙省當用  
兵之際民心搖動臣才識未裕精神已衰自揣難  
勝厥任現署巡撫之布政使陳秉直年壯才優素  
為民心悅服乞

敕部補授下部議不准

特旨允陳秉直陞補巡撫達都仍以原銜理餉十四年二  
月疏言大軍分勦叛賊處州温州指日恢復催辦

糧料綏輯流民惟道府是賴請于在浙軍前勤勞  
素著之官酌量選補以留浙効用僉事姚啟聖補  
溫處道通判王國泰補溫州知府運判線一信補  
處州知府又疏請以辦運軍糈勤勞最著之經歷  
許嗣華縣丞鄭廷俊等分補廳縣正佐官二十餘  
員俱下部議從之九月疏言衢州等處大兵雲集  
浙省本年鹽課先經奏准按季徵解難供急需溫  
州陷賊金衢台嚴處五府地丁銀兩催科莫應杭

嘉湖寧紹五府卽照額全完僅供駐防滿漢官兵俸餉今大兵每月約用銀二十萬餘兩請就近撥給以濟軍需下部議撥長蘆鹽課十萬兩山東地丁十萬兩赴浙應用十五年八月康親王傑書統帥自金華移駐衢州達都前往經理糧餉十一月疏言大兵俱已進閩需餉甚多陸續解銀二十萬兩又將現存司庫銀五萬兩委官隨臣解赴閩省計滿漢綠旗官兵每月需餉數十萬兩閩地殘破

無從措辦請于就近省分地丁鹽課等銀添撥五  
六十萬兩竟解閩省接濟大兵供應疏下部議撥  
江南庫銀四十萬赴閩十六年七月大軍由閩入  
粵達都與副都統沃申等駐潮州十七年五月海  
賊鄭錦犯海澄將軍賚塔由潮州帥師赴援海賊  
楊金目等聯鯨由鰲頭突犯團山達都與總兵馬  
三奇遣兵撲勦斬賊五百餘生擒長髮賊五名礮  
沉賊船追至寮口賊由急水東岸遁十八年八月

召補戶部右侍郎十二月至京

召詢海賊情形奏言臣來時廈門金門賊勢大挫賊船較前甚少聞海中糧米無從湊集賊不能久不日可定

上曰今海禁甚嚴賊糧從何而來達都奏賊所恃屯糧之處俱為大兵所有惟向廣東高州海島稍稍竊運而已

上曰當賊匱糧之際大兵速取海澄要害之處則賊失所

憑依全閩可定夫師行既繁民力重困若能一舉滅賊  
地方速平大兵無野處之苦民困自此甦矣十九年七

月轉左侍郎十一月

命往盛京會議鹽務還奏

盛京新舊官兵及百姓呈訴未設鹽商之前食鹽每  
觔不過三四文自設商納課以來每觔至十餘文  
又鹽舖俱設于府州縣城貧民自屯庄往買有誤  
農業且路遠多費因傳問鹽商等又據稱鹽課已

勉強認納價值斷難減少臣等伏思八旗新舊管  
兵皆賴田禾為生地方百姓係安插招徠流徙之  
人盡屬窮苦且吉林寧古塔居住之人並新滿洲  
及邊外蒙古等俱遠來買食自康熙十八年招募  
商人准行鹽引一萬三千七百七十四道徵課銀  
六千五百二十三兩十九年加增鹽引三千一百  
道徵課銀一千四百六十八兩在官徵課無幾食  
鹽之昂貴倍增應停止鹽商辦課仍照舊聽有鍋



之人煎鹽依從前賤價售賣不許豪強霸佔責令  
奉天將軍戶部侍郎察禁下九卿等議從之三月  
調吏部左侍郎二十一年二月遷左都御史七月  
卒

賜祭葬如例

欽定八旗通志卷一百五十八

欽定四庫全書

欽定八旗通志卷一百五十九

人物志三十九

大臣傳二十五

滿洲正白旗四  
碩岱 伊巴罕 郎坦  
阿察達 碩岱 伊巴罕 郎坦 達哈

塔 瑪爾漢 覺羅舒恕 費揚古 桑格

邁圖

邁圖滿洲正白旗人姓佟佳父烏進世居哈達

國初來歸任典儀邁圖初任二等待衛順治五年從

征山東破賊首蔣靜剛於鋸齒山岩十五年隨信  
郡王多尼征明桂王朱由榔至貴州連破其將李  
成蛟於涼水井李定國於雙河口定國走魯噶立  
寨以拒復擊破之康熙十三年逆藩耿精忠叛邁  
圖隨康親王傑書征之授營總十四年大軍自仙  
居趨黃岩至半山嶺偽都督劉秉仁糾衆萬餘來  
拒邁圖偕副都統吉勒塔布等奮擊斬賊二千餘  
十五年克建陽縣闕廂敗偽總兵王姓三千餘衆

十六年正月海逆鄭錦偽總督趙得勝偽將軍何  
祐等擁衆四萬據興化於城西北太平山屯營二  
十六伏賊萬餘於白茅山為援邁圖隨寧海將軍  
拉哈達先攻其伏賊敗追至太平山盡破其營斬  
得勝於陣復興化祐退據泉州二月進擊拔之賊  
敗遁十七年隨平南將軍賚塔擊鄭逆偽將軍劉  
國軒吳淑等於蜈蚣山破其營七復長泰縣二十  
五年正月授正白旗蒙古副都統兼佐領五月叙

功授雲騎尉二十九年六月署前鋒統領隨裕親  
王福全剿厄魯特噶爾丹於烏闌布通陣歿部議  
給祭葬如例

特命加祭一次謚忠毅子瑪喇襲雲騎尉三十年追叙邁  
圖功加世職為三等輕車都尉

郎坦

郎坦滿洲正白旗人姓瓜勒佳內大臣武拜之子  
也年十四任三等侍衛

世祖章皇帝順治六年遷二等侍衛隨端重親王博洛征  
叛鎮姜瓖師次渾源州城圍之賊渡濠來犯郎坦  
射其首貫心而殪遂敗賊衆師還擢一等侍衛八  
年以武拜附和內大臣洛什博爾輝等造言搆釁  
獲罪並革郎坦任九年

恩授三等侍衛尋復一等侍衛

聖祖仁皇帝康熙二年代父管佐領遷護軍叅領隨定西  
將軍圖海征流賊李來亨等於湖廣茅麓山同護

軍叅領葉楚赫深入賊巢擒偽官十一人四年襲  
父一等子爵仍任一等侍衛十二年京城有邪教  
陳三道等設壇惑衆郎坦率諸侍衛逮繫之十三  
年奉

命行邊捕獲逃盜張飛腿等於板城十九年擢正白旗蒙  
古副都統明年調本旗滿洲副都統二十一年八  
月

上以俄羅斯屢擾黑龍江邊境久據雅克薩地



命郎坦同副都統朋春率兵沿黑龍江行獵覘雅克薩情形相度水陸往來遠近十二月疏言俄羅斯久據雅克薩恃有木城若發兵三千攜紅衣礮二十具即可攻取陸行自興安嶺以往雖無險山而林木叢雜途徑反隘冬雪之時沙結堅冰夏日遇雨泥深淤阻惟輕裝可行水程自雅克薩還至愛濤城於黑龍江順流行船僅須半月觀兩岸悉可繹挽若逆流行船約須三月視從陸倍期於運糧饒軍

器輜重為便現有大船四十小船二十六宜增造  
小船五十餘奏入

詔寧古塔將軍巴海等造船備礮擇要地駐守暫緩進兵  
二十二年二月擢郎坦前鋒統領九月

命往會黑龍江將軍薩布素酌議駐兵額素哩事宜還奏  
額素哩今年七月即經霜雪來年宜乘春和時以  
寧古塔諸處兵分為三班更番往駐

上以更番戍守非久長策不允行二十三年甄別八旗管

兵官員之弗勝任者罷郎坦前鋒統領以子爵隨  
旗行走二十四年正月都統朋春同臺灣投誠左  
都督何祐率兵征雅克薩副都統班達爾沙護軍  
統領佟寶為叅贊郎坦以副都統銜隨征師既行

上遣侍衛往

諭朋春曰朕以仁治天下素不嗜殺爾其嚴諭將士毋違  
朕旨以我兵馬精強器械堅利俄羅斯勢不能敵必獻  
地歸誠爾時勿殺一人俾還故土宣朕柔遠至意五月

師薄雅克薩城朋春班達爾沙等軍其城南何祐等集戰船於城東南潛進紅衣礮於城北與副都統溫岱等將夾攻之先積柴城下為焚城狀其城長額里克舍乞降郎坦宣

恩諭宥其罪額里克舍稽顙謝引六百餘人徙去其願來內附者巴什里等四十五人挈妻子及前此被掠之索倫達呼爾戶口百餘俱隨大將軍還奉

詔安插內地毀其木城郎坦與議政王大臣等會議鎮守

事宜議於墨爾根築城駐兵是年冬俄羅斯復據雅克薩築城明年二月

命同班達爾沙搗礮率藤牌兵百往會黑龍江將軍薩布素進征旋奉

詔以郎坦諳悉地形即令叅贊軍務六月師薄其城鑿壕築壘四面列圍賊出拒阻擊敗之斬額里克舍尋以俄羅斯察罕汗遣使詣

闕謝罪請釋雅克薩圍

上命以別遣使來議地界

詔釋圍退駐查克丹待之尋還駐寧古塔明年擢郎坦正

白旗蒙古都統二十八年俄羅斯議界使人費耀

多羅等至尼布楚

上遣領侍衛內大臣索額圖等同郎坦往議以格爾必齊

河及額爾固訥河為界毀雅克薩城令其人徙去

是年調正白旗滿洲都統二十九年古北口外突

聚羣盜劫掠七莊郎坦奉

命偕侍衛赫濟爾亨等督石匣城古北口官兵捕剿出喜  
峯口追及之龍鬚門盜以烏鎗抗禦逃據山頂擲  
石拒阻傷害綠旗兵三人從役一人赫濟爾亨率  
兵發矢殪十餘盜復分兵山坡繞後截擊斬四十  
餘盜無一脫者郎坦還奏羣盜逞兇傷害兵丁侍  
衛及衆官兵奮勇擊斬狀下部議卹賞紀錄有差  
三十一年正月

上以噶爾丹肆掠喀爾喀逼我邊境授郎坦安北將軍駐

防大同二月疏請出邊駐喀喇穆倫以偵賊情申  
嚴邊備

詔暫駐歸化城七月

命同副都統碩鼐叅領素丹等勘閱寧夏延綏西寧沿邊  
進兵道路以

聞三十一年擢領侍衛內大臣兼火器營總管列議政大  
臣三十二年授昭武將軍率兵駐甘州八月擒獲  
哈密回人之輸稅厄魯特者訊知噶爾丹所在請



於來春率兵進剿疏下王大臣等議以噶爾丹已遣使乞宥罪止之三十二年三月

上以寧夏近賀蘭山為邊隘要地

諭郎坦率兵移駐於甘肅提督孫思克分領噶爾丹及其侄策旺喇布坦構釁事遇有邊警會商禦剿七月

上聞噶爾丹將逼圖拉

諭郎坦熟練邊情移兵圖拉禦剿尋以圖拉無警還京仍

任領侍衛內大臣預議政三十四年五月

命往盛京察視邊隘至八虎口疾劇

遣太醫往視六月卒年六十有二櫬至通州

遣侍衛四人奠茶酒

賜祭奠如例子拉忻襲爵

阿密達

阿密達滿洲正白旗人姓他塔喇順治四年授三等侍衛洊遷至一等侍衛兼佐領九年遷護軍叅

領十四年擢正白旗滿洲副都統康熙八年遷護  
軍統領十年擢領侍衛內大臣明年列議政大臣  
十三年三月襄陽總兵楊來嘉附逆藩吳三桂據  
穀城叛河北總兵蔡祿初與來嘉並為海賊鄭成  
功裨將成功死先後率衆來降並授左都督擢任  
總兵至是聯結謀叛蔡祿造烏鎗購羸馬令兵丁  
以捕魚為名演習披甲適奉使侍衛觀寶偵得其  
狀以奏

聖祖仁皇帝命阿密達率護軍叅領八員每佐領下護軍一名馳赴懷慶察視阿密達至祿不出迎集礮手以拒阿密達直入其廨擒蔡祿及其家口以奏

上手勅諭之曰爾行未踰旬克濟厥事以遏亂萌朕心深為嘉悅但人命至重須研審得實方可正法毋得株連無辜至所俘人口散給士卒宜重賞被傷者以示鼓勵

阿密達遵

旨勸訊得蔡祿與楊來嘉遣人往來潛謀投順吳逆且與

子侄家人私議若大兵來懷慶閉城以拒突圍  
往據太行山情狀奏

聞

命將蔡祿及子姪同謀者俱正法時耿精忠亦叛

上慮江寧兵單撥滿洲兵千人駐守以阿密達總統授為  
揚威將軍五月

命以所統兵習水戰九月授簡親王喇布揚威大將軍駐  
江寧以阿密達為叅贊十一月陝西提督王輔臣

叛

命阿密達率兵赴西安明年正月仍授揚威將軍印以副  
都統鄂克濟哈覺羅夸岱叅贊軍務率所部兵及  
西安駐防兵之半赴蘭州剿禦大將軍貝勒洞鄂  
以西安兵單奏留阿密達駐守

上以蘭州關係緊要仍

諭遵前旨行二月王輔臣據平涼蘭州諸路皆陷賊洞鄂  
自率兵赴秦州奏令阿密達剿平涼賊未至聞賊

據涇州分兵遣鄂克濟哈剌擊斬偽總兵衛民譽  
獲馬匹器械復其城五月復遣兵敗賊於寧州之  
東山斬馘八百餘復寧州並得

旨嘉獎先是阿密達與平涼賊戰失利退駐涇州至是聞  
洞鄂與總兵孫思克等復秦州疏言逆賊王輔臣  
悉銳集平涼令秦州遁回之賊又至慶陽羣盜依  
山結壘與為聲援臣以孤軍前進恐未易奏功乞

敕大將軍洞鄂酌量留兵駐守秦州餘兵盡會平涼並

命提督陳福及鄂爾多斯兵急取定邊固原以遏賊慶陽之援臣率兵出白水由平涼東面進取庶易為力

上曰兵貴神速機不可失平涼逆賊聞大兵克取秦州正在驚擾我兵宜乘勝長驅攻取平涼將軍阿密達逗遛不前殊屬非宜前已增調太原兵近總督周有德又運送紅衣礮爾等當速取平涼八月洞鄂兵亦至平涼

命阿密達叅贊軍務速行進攻是月分兵三隊進剿擊敗賊兵萬餘追奔至城外賊據山險拒守會總兵孫



思克由西路入與大兵合剿屢敗賊衆十二月阿  
密達偕孫思克等分兵赴城西掘壕守護以防賊  
逸偽總兵蔡元糾衆四千由山梁攜火器來犯我  
軍擊敗之克取山梁擒斬甚多十五年二月

上以貝勒洞鄂等屯兵日久未能滅賊

命大學士圖海代為大將軍阿密達與洞鄂等並任叅贊  
五月我兵分兩翼由虎山墩進攻阿密達與孫思  
克督兵大敗賊衆斬偽總兵二六月王輔臣降平

涼平十七年二月圖海請三路進兵分剿叛附吳  
逆諸賊阿密達偕副都統覺和託四川總督周有  
德等率兵至秦嶺與賊戰斬馘三百撫定諸賊巢  
尋

命赴湖南安親王岳樂軍營協剿逆孽吳世璠十八年九  
月大兵克武岡州

諭阿密達與安親王酌議軍營留兵事宜十一月奏言軍  
營滿洲兵每佐領酌留十二人防守其每佐領八

人前鋒二百人護軍每佐領三人驍騎並漢軍每  
佐領五人俱遣還

上命阿密達率之回京十九年十月授正白旗蒙古都統  
二十一年七月以三逆平定

特遣大臣頒賞厄魯特喀爾喀諸部阿密達預馬二十二  
年三月兵部議阿密達在平涼攻戰時我兵退回  
不能禁阻應盡革職任

上曰阿密達為人頗優且多勞績其令降五級從寬留都

統任二十六年八月調本旗滿洲都統二十八年十月  
復授領侍衛內大臣二十九年六月噶爾丹與噶  
爾喀構釁侵我外藩蒙古烏珠穆沁界

上命阿密達往領副都統噶爾瑪等所轄弁兵偵探賊情  
具奏七月以裕親王福全為撫遠大將軍阿密達  
與公蘇努等為叅贊是月抵岡阿與噶爾瑪軍合  
復會尚書阿喇尼軍於葫蘆谷爾河以噶爾丹所  
在入奏

上以噶爾丹退回二宿之地似欲潛遁

命阿密達速選精壯馬兵率之前往便宜行事時濟隆胡  
土克圖使人至軍營阿密達遣郎中哈爾吉布等  
與偕至噶爾丹所未幾噶爾丹亦遣尊多伊格蘇  
爾為使其述所以入汛為索喀爾喀讐人弗敢秋  
毫侵犯阿密達以

聞且奏賊衆內逼狀遂與蘇努會合裕親王軍分大軍為  
三蘇努等率左右兩翼阿密達與王等統中軍以

進八月朔至烏蘭布通噶爾丹依山列陣卧駱駝  
於林外拒河以守我左翼兵由山腰衝入大軍臨  
之大敗其衆會日暮收兵次日剿殪餘寇賊堅壁  
據險遣使矢誓請和尋自錫喇穆稜河載水橫渡  
大磧山夜遁去十一月師回部議王大臣調度乖  
方既經戰勝不能乘機剿滅賊敗又不即追殺以  
致窮寇遁走貽誤軍機又未經請

旨擅率大軍內徙福全應革王爵阿密達與蘇努等皆革

職

上念我軍已擊敗厄魯特王大臣槩從寬免革爵職阿密  
達降四級留任三十一年二月以年老乞休

死之三十五年二月

上親征噶爾丹阿密達奏請隨征與康親王傑書管理鑲  
藍旗營務五月

駕至克魯倫河復奏請効力隸左翼大軍尋揀選精銳追  
剿噶爾丹以阿密達暫充將軍率留後之滿洲兵

及綠營步兵赴克勒和碩既至

命兼轄留駐兵尋以撤兵回京四十八年五月卒

碩岱

子海綬

碩岱滿洲正白旗人姓喜塔臘先世居尼雅滿山  
有昂郭都哩巴顏者當

太祖高皇帝時來歸碩岱其五世孫也

世祖章皇帝順治六年以二等待衛兼叅領隨睿親王多

爾袞討大同叛鎮姜瓖復渾源州九年三月



上幸南苑碩岱與一等伯巴什泰及蒙古侍衛素尼並從  
素尼猝拔刀殺巴什泰碩岱即舉所執長鎗擊素  
尼立仆擒之置諸法

上嘉其勇敢予騎都尉銜一雲騎尉世職十三年授護軍  
叅領十五年隨征南將軍卓卜特由廣西征貴州時  
明桂王朱由榔之將李定國李成蛟等分據黔西  
要隘碩岱率兵渡盤江擊敗成蛟於涼水井復擊  
敗定國於雙河口十六年大軍取雲南追剿定國

至騰越碩岱遇伏於磨盤山力戰克捷十八年山  
東土賊于七據棲霞縣之岨嶠山作亂碩岱隨靖  
東將軍濟什哈往剿斬獲賊黨無算于七竄入海  
聖祖仁皇帝康熙六年擢前鋒統領十二年冬逆藩吳三  
桂反

上以荊州地當衝要

命碩岱領前鋒兵先諸軍進發固守荊州俟諸軍繼至再  
進據常德以遏賊勢十三年正月碩岱至荊州二

月賊陷常德及澧州犯宜昌時順承郡王勒爾錦  
統大軍至碩岱奉

詔叅贊軍務同護軍統領額斯泰等援宜昌擊卻賊將劉  
之復陶繼智等十四年十二月

諭責順承郡王駐荊州久未能恢復湖南郡邑罷碩岱叅  
贊十六年安親王岳樂自江西進圍長沙碩岱隨  
征南將軍穆占都統宜里布等移兵助攻取道岳  
州韶岡河遇賊艘四十餘運糧至擊敗之進圍長

沙數月賊負固不下

詔穆占移師規取衡州碩岱隨穆占征茶陵賊棄城遁攸  
縣碩岱同宜里布率兵追剿賊據河岸拒戰我兵  
奮擊賊潰奔遂復攸縣十七年隨穆占恢復郴州  
永興桂陽興寧還駐郴州賊將馬寶胡國柱等犯  
永興碩岱率兵往援戰失利都統宜里布護軍統  
領哈克三歿於陣副都統託岱宜思孝等還郴州  
碩岱棄營入永興城穆占奏劾之

詔免逮繫令立功贖罪時賊勢猖獗屢逼犯永興碩岱同  
前鋒統領薩克察等嬰城固守逾三月吳三桂死  
賊乃遁去十八年大軍復寶慶武岡撤八旗兵三  
之一還京碩岱同內大臣阿密達等率以行既至  
京追議永興戰敗罪罷任革世職二十九年起為  
正白旗滿洲副都統三十年隨定北將軍瓦岱征  
噶爾丹至克魯倫河偵賊衆遠去旋師三十四年  
十月同都統噶爾瑪率兵駐大同三十五年正月

上親征噶爾丹統師出中路以撫遠大將軍費揚古出西路費揚古請選大同所駐護軍二百八十人為前鋒

詔以碩岱署前鋒統領率之往四月

上統師擊噶爾丹於克魯倫河噶爾丹聞風驚遁時碩岱與費揚古並在圖拉

上度賊必遁往西路先傳

諭費揚古邀賊費揚古偵賊至特埒爾濟口令碩岱率前

鋒挑戰且戰且卻誘至昭莫多合兵奮擊斬獲無算噶爾丹引數騎遠竄師旋擢碩色內大臣叙功予雲騎尉世職

上念其勞績素著

命復前所革世職晉為三等輕車都尉五十一年卒年八

十有四

賜祭葬如例以其第三子納丹珠襲職第四子海綬於雍

正七年以護軍校隨大將軍傅爾丹征準噶爾九

年擊賊於和通呼爾哈諾爾力戰陣亡議卹予雲  
騎尉世職子沙通阿襲

伊巴罕

伊巴罕滿洲正白旗人姓格濟勒世居雅蘭其伯  
父舒球於天聰八年隨副都統薩木什喀巴奇蘭  
征黑龍江有功予騎都尉世職卒無子以伊巴罕  
襲伊巴罕初授三等侍衛旋任刑部郎中兼佐領

順治七年九月三遇



恩詔晉世職至二等輕車都尉十八年署叅領隨定西將  
軍愛星阿征明桂王朱由榔至緬甸緬人執由榔  
以獻康熙十四年任護軍叅領隨定南將軍希爾  
根討逆藩耿精忠至江西偽都督易天錫據建昌  
府城伊巴罕率兵進攻大敗賊既而撫州賊悉趨  
援建昌伊巴罕奮戰卻賊復擊敗偽將軍卞連登  
偽總兵李茂珠等拒戰賊衆尋與護軍統領桑額  
攻復新昌縣擒斬偽總兵朱一典及賊黨無算十

五年擢正白旗蒙古副都統隨安親王岳樂討逆  
藩吳三桂擊敗其偽將軍夏國相等復萍鄉縣十  
八年隨征南將軍穆占討三桂孫世璠自衡州進  
征武岡賊將吳國貴以二萬衆據楓木嶺拒戰伊  
巴罕率本旗兵奮擊大破之十九年擢前鋒統領  
二十二年遷

盛京將軍二十四年

召還仍授前鋒統領二十五年叙前隨征江西湖廣軍功

晉世職為一等輕車都尉兼一雲騎尉後以年老乞休尋卒子蘇完住改襲三等輕車都尉

達哈塔

達哈塔滿洲正白旗人姓佟佳

世祖章皇帝順治九年繙譯進士分內院學習十三年授

國史院侍讀

聖祖仁皇帝康熙三年遷宏文院侍讀學士九年十月定

內閣翰林院官制令以內閣撰文中書舍人兼太

常寺卿十年正月改翰林院侍讀學士十二年十月遷太僕寺卿十四年海遷太常寺卿通政使司通政使都察院左副都御史十六年五月授兵部督捕左侍郎十八年三月京察論才力不及降調十月左都御史魏象樞疏薦達哈塔清謹自守四壁蕭然人有醇樸之風行無奔競之習疏下部議候四品卿錄用二十二年九月補通政使司左通政十月仍授兵部督捕左侍郎二十三年八月

諭之曰朕以爾素有操守簡任侍郎近見督捕事務尚多  
弊端旗下人不無怨言若但守己廉潔而凡事不能肅  
清究竟何益嗣後爾當嚴率屬員勉力釐剔以副委任  
之意九月調吏部左侍郎管右侍郎事十二月擢左都  
御史二十四年四月九卿以靖海將軍施琅奏定  
沿海各港門出洋船數及閩海關監督伍什  
巴奏給貿易捕魚各船照票增設抽稅衙署等事

分晰議入

命達哈塔往福建會同施琅定議還奏海禁既開應聽商賈貿易小民捕魚勿限人數船數無篷桅船仍令地方官驗放有篷桅船由監督烙號給票徵稅其營船按汛防守不許越界攜貨廈門南臺各設抽稅衙署並分撥哨船於沿海要口二十餘處巡行察驗九月擢吏部尚書二十六年三月監修賦役全書先是戶部以舊刊賦役全書所載錢糧尾數在絲忽秒撮以下者繁冗易滋弊竇請增入毫勺內

重編簡明新書給事中楊周憲言其名為簡明實  
滋紛擾下廷臣詳酌既定議

召詢九卿科道意見同否達哈塔奏錢糧事臣不能洞  
悉今仍存絲以上之數但刪忽以下之數綜計所  
刪銀僅數千兩而檔冊簡明易核臣等故同一議

上曰朕原不惜刪去些微錢糧但論有益於民否耳尚書  
李之芳給事中任辰旦御史錢珏相繼奏檔冊簡  
明吏胥不得作弊實有益於民遂以刑部侍郎蘇

赫副都御史胡昇猷光祿寺卿龔佳育會同戶部  
監造至是達哈塔奉

命同尚書王日藻監修四月以雨澤愆期

詔同大學士勒德洪余國柱等清理刑部獄囚時尚書湯

斌少詹事耿介等為皇太子先初講官達哈塔奉

命與湯斌耿介並輔導皇太子六月以講書失儀三人俱

罰俸達哈塔奏言臣奉

命輔導東宮誠欲竭力自効恪供厥職奈斌性愚拙動輒



愆儀數日之內負罪實多以湯斌耿介尚不能當  
輔導之任况庸陋如臣敢不亟請罷斥下部察議  
以輔導東宮為日未久遽自請罷規避圖安應革  
職得

旨寬免是月正白旗驍騎校阿齊尼叩

閣控訴本旗都統馬哈達與原任征南大將軍賚塔之  
子倂色孫福保等朋謀誣陷事

上命達哈塔鞠訊

諭之曰馬哈達係爾族姪倭色亦爾親戚爾素稱鯁直自能秉公審斷七月奏阿齊尼初以家丁琿齊作滿洲告馬哈達准令披甲副為佐領福保舉首琿齊係漢人不應披甲馬哈達據詞牒部阿齊尼懷恨控告上以所奏含糊令再審復得琿齊實係滿洲馬哈達偏聽福保誣坐阿齊尼誑與披甲狀請革馬哈達福保職並以前審未得實情自請議處吏部議達哈塔徇庇馬哈達福保應革職

詔從寬改為降五級留任八月卒於官年五十有五

瑪爾漢

瑪爾漢滿洲正白旗人姓兆佳由順治十一年繙  
譯舉人授工部七品筆帖式累遷內閣侍讀刑部  
員外郎

聖祖仁皇帝康熙十三年陝西提督王輔臣叛應逆藩吳  
三桂

上命揚威將軍阿密達自江寧移師往討瑪爾漢隨征署

驍騎叅領十四年四月同副都統鄂克濟哈穆舒  
瑄等由涇州進剿連破賊寨斬級數百復寧州城  
十五年六月撫遠大將軍圖海統兵圍平涼王輔  
臣降瑪爾漢還京十二月圖海請調涼州寧夏固  
原諸鎮兵進定興安漢中

上命副都統烏丹同瑪爾漢赴諸鎮經理征調事並詢商  
緩急機宜甘肅提督張勇言興安漢中山峻路險  
運饟維艱宜暫緩進征

上是其言令圖海駐守鳳翔秦州諸要隘分兵遣助湖廣  
大軍

命瑪爾漢隨征南將軍穆占規復湖南十七年授監察御  
史仍留軍營十九年穆占進征貴州二十年進征  
雲南瑪爾漢俱隨征得功牌十有二副追論湖南  
諸將弗力援永興致將士損傷罪瑪爾漢抵銷功  
牌九十二年

命巡視河東鹽務會御史許承宣羅秉倫先後劾奏前任

山西巡撫圖克善勒令平陽府所屬十三州縣增報鹽丁加課累民事下巡撫穆爾賽會同瑪爾漢確核遂覆奏虛報一萬七千餘丁應豁免此後課銀一萬五百四十餘兩得

旨先行二十五年以審理歸化城都統固穆德罪案不實降三級調用二十六年補理藩院司務尋遷戶部郎中三十三年四月遷翰林院侍講學士七月擢兵部侍郎三十五年

上親統大軍由中路征噶爾丹

命瑪爾漢經理驛站駐劄土木遇西路軍營奏報本章遞

送

御營是年八月以解送軍營馬匹在蒙古地方牧養瑪爾

漢不遣蒙古司員監視致瘦斃者多部議革職

命從寬留任三十八年六月擢都察院左都御史十月遷

兵部尚書尋充

經筵講官兼議政大臣四十三年三月

上諭八旗都統曰聞京城就食之民近自河間遠自山東已於五城給食恐尚未徧及著八旗各於本旗城外分三處煮粥派家計殷實家人衆多之大臣監散凡就賑之民病則醫治歿則棺斂給粥時各清晰認務使周徧於是瑪爾漢同內大臣佟國維明珠阿密達等並奉命監賑四十六年調吏部尚書四十八年正月以老疾乞

休

先之五十七年十二月卒年八十有五遺疏上得



青瑪爾漢宣力年久素著勤勞前以衰老乞休與其善加  
頤養准予解任茲聞溘逝深為憫惻下所司議卹

遣內大臣侍衛往奠

賜祭葬如例

世宗憲皇帝雍正八年六月

諭閣臣曰原任吏部尚書瑪爾漢為人謹慎小心老成忠  
厚在

聖祖仁皇帝時宣力多年完名引退中外皆稱為善人著

加增太子太傅賜祭一次以示朕眷念耆舊之意是年

八月

詔建賢良祠以大學士圖海都統賚塔尚書顧八代等與

瑪爾漢並入祀

今上乾隆九年

詔九卿核議已祀賢良諸臣之應追謚者列奏

賜瑪爾漢謚曰恭勤

覺羅舒恕

覺羅舒恕滿洲正白旗人武功郡王禮敦之三世孫也順治十二年任侍衛由三等游陞一等

聖祖仁皇帝康熙八年六月授兵部督捕侍郎十年三月遷吏部侍郎十三年三月逆藩吳三桂臨湖南

命內大臣希爾根為定南將軍帥師之江西以舒恕叅贊軍務尋署前鋒統領六月

諭希爾根於每佐領下撥驍騎三名付舒恕剿賊時聞逆耿精忠遣賊犯江西臨撫州九月舒恕隨希爾根

進剿擊敗逼城立營之賊賊自城中出拒又自建  
昌路率衆來犯連擊敗之賊尋棄撫州奔竄舒恕  
督兵追殺數十里十二月擊敗屯據東鄉縣界賊  
衆十四年三月賊復犯撫州舒恕督叅領邁蘭協  
領緝勒們等迎剿敗之七里岡追殺三十餘里時  
建昌已恢復餘賊尚據新城縣五月舒恕偕都統  
覺羅霍特督兵克復縣城擒僞遊擊許定國又偕  
總兵許貞敗賊於宜黃復宜黃崇仁樂安三縣未

幾廣東告急

上命舒恕率兵赴援十月授鎮南將軍時叛鎮馬雄偕吳  
逆偽將王宏勳糾衆犯高州勢猖甚舒恕擊之失  
利退駐肇慶十五年二月平南王尚可喜病篤其  
子之信通賊倡兵作亂舒恕退回贛州簡親王喇  
布以

聞

詔舒恕堅守南安梅嶺以保固江西十六年三月

諭曰今大兵分路進征逆賊不暇窺贛其改授副都統莽  
依圖為定南將軍率兵赴粵侍郎舒恕量留甲兵同巡  
撫佟國楨鎮守贛州舒恕尋遣知縣郭毓秀招降偽官  
劉定邦即令持札招撫偽總兵關世榮偽副將周  
先德等別遣遊擊陳廷玉招撫偽總兵張輝偽副  
將鄧瑞等復遣都司廖正英招撫偽總兵王受之  
合計降兵數萬先後疏

聞六月授南安將軍七月簡親王以吳逆聚寇宜章將窺

南韶入奏

詔莽依圖迅赴韶州舒恕率兵守南安南雄為之聲援舒  
恕尋遣副都統赫呼布率兵赴韶州十七年二月  
將軍額楚疏報總督金光祖潯州失利

諭舒恕迅赴南雄鎮守兼顧韶州四月將軍穆占疏言郴  
州桂陽新復幅員遼濶賊來無兵可禦請

敕舒恕移駐防守時尚之信已反正亦以宜章地方緊要  
請令舒恕駐守

詔舒恕具南雄韶州情狀以聞舒恕疏言南韶為湖南江西廣東三省接壤要地不可輕離十二月莽依圖疏報梧州危急

諭曰南雄韶州已為內地舒恕其率所屬兵迅赴梧州十八年四月即軍前授都察院左都御史六月逆賊吳世綰糾衆犯南寧城中食盡旦夕且陷額楚等引前鋒兵擊敗西山賊衆舒恕同莽依圖督衆兵進豫遣左翼兵潛出山後截賊歸路盡殲之世琮



負重傷以數十騎遁南寧圍解十月舒恕以病劇  
乞回肇慶調理

詔回京既

召對

諭大學士等曰朕以舒恕病劇必實故召還京師昨見之  
神色如故絕無病狀舒恕前在高州敗回肇慶復自廣  
東退奔不據韶州南雄諸要地竟還贛州致江西全省  
震動又以巡撫金雋之言盡洩於尚之信又不欲將軍

傅宏烈進兵恐嚇阻撓舒恕身為將軍負如許重罪不思戮力自贖詐稱病劇肆行欺罔著羈候宗人府俟旋師之日嚴察議奏十九年七月裕親王福全等覆訊以舒恕身為將軍詐稱患病不行奏明私以印信

敕書交將軍莽依圖罪一又前進取高州至電白為賊所敗罪二又自廣州敗出不據韶州南雄諸要處以遏賊勢乃退歸贛州致江西全省震動罪三又因巡撫金僑之言已知尚之信逆謀乃不行密奏反

疑金雋之言為吳逆離間計遣人潛告尚之信云  
以安其心辦理錯謬罪四又阻撓傳宏烈進兵罪  
五應革職任籍沒家產得

旨革職免籍沒三十四年二月授鑲黃旗滿洲副都統六  
月出任山西右衛左翼護軍統領七月授寧夏將

軍時

上以噶爾丹欲掠墨爾根濟農

諭安北將軍費揚古加意防備費揚古自請率兵防阿爾

察圖蘇穆哈達地以舒恕率兵一千五百名往駐  
歸化城北額埒蘇台地十一月授費揚古撫遠大  
將軍以舒恕同都統伊呼慎等叅贊三十五年正  
月

上親征噶爾丹由獨石口出中路授舒恕揚威將軍率右  
衛兵隨費揚古出西路五月費揚古擊敗噶爾丹  
於昭莫多舒恕率右衛兵還駐納喇特六月奉

詔回歸化城籌辦凱旋軍糧八月疏請仍赴喀喇穆倫費

揚古軍前十一月

上駐蹕棟斯拉

召費揚古議軍務以舒恕暫署大將軍事三十六年閏三  
月

詔費揚古移師郭多里巴勒噶遜舒恕仍以揚威將軍留  
駐喀喇穆倫屢收納降人遣送入京並傾奏噶爾  
丹困窘狀五月費揚古疏報噶爾丹竄死

詔叙功予舒恕雲騎尉世職

召還京三十七年二月擢正藍旗滿洲都統四十年十二月以病乞休致仕四十二年五月卒年六十有五賜祭葬如例子延壽襲雲騎尉由侍衛游擢歸化城副都

統右衛將軍

費揚古

費揚古滿洲正白旗人姓棟鄂內大臣鄂碩之子也

世祖章皇帝順治十五年襲父三等伯爵

聖祖仁皇帝康熙十三年隨安親王岳樂率兵赴江西討  
逆藩吳三桂委署營總時賊將黃乃忠糾賊萬餘  
自長沙犯袁州費揚古與副都統沃赫總兵趙應  
奎等擊敗之擒偽官童聖功復萬載縣城十五年  
擊走賊將夏國相於萍鄉毀寨十二進圍長沙屢  
戰皆捷十八年敗賊將吳國貴於武岡凱旋紀功  
擢領侍衛內大臣兼火器營總管列議政大臣二  
十八年

命頒賚喀爾喀左翼土謝圖漢二十九年

上以噶爾丹剽掠喀爾喀又數擾我邊境授裕親王福全

撫遠大將軍費揚古往科爾沁調兵隨征叅贊軍

事是年八月擊敗噶爾丹於烏蘭布通三十二年

命費揚古為安北將軍駐歸化城三十三年五月噶爾丹

使人至歸化城言欲入貢費揚古偵其踵至者男

婦凡二千人遣兵迎問且止之馳疏請

青



上知噶爾丹陽為修好潛蓄窺探意

命侍郎滿丕諭責其使遣之還七月

上聞噶爾丹將逼圖拉

詔費揚古同右衛將軍希佛率兵往禦希佛請益兵

上責希佛遇事疑沮令弗偕往

諭大學士等曰費揚古勲舊大臣今駐防歸化城軍民皆  
心服於此事無不能辦也尋以圖拉無警慮噶爾丹將

趨歸化城

詔費揚古旋師三十四年七月噶爾丹至塔密爾費揚古  
率兵往禦噶爾丹由圖拉河西竄去十月授右衛  
將軍仍兼管歸化城將軍事十一月疏言聞噶爾  
丹據巴顏烏蘭距歸化城約二千里宜集兵運糧  
於來年二月往剿

詔授為撫遠大將軍

召入覲受

方畧三十五年二月以黑龍江將軍薩布素率兵出東路

命費揚古集兵歸化城出西路振武將軍孫思克率甘肅兵西安將軍博霖率陝西兵會期並進

上親統大軍出中路四月費揚古至察罕和碩噶爾丹驅賊衆趨克魯倫河東路兵未至科圖而

上已由科圖進次什巴爾台近壓賊境五月三日費揚古師至圖拉疏言西路有草之地為賊所焚我軍每迂道秣馬又遇雨糧運遲滯師行七十餘日人困馬疲乞

上緩軍以待會噶爾丹望見

御營於克魯倫河大驚奔竄

上密諭費揚古邀擊

親督大軍躡追至拖諾山

駐蹕費揚古聞噶爾丹遁歸特呼勒濟遂遣前鋒統領碩

岱副都統阿南達阿迪等率兵先往挑戰且戰且

卻誘至昭莫多復分兵三隊東則滿洲漢軍及察

哈爾兵倚山列陣西則右衛大同及喀爾喀兵沿

河列陣而使將軍孫思克率綠旗兵居中並導

上方畧令官兵皆步戰俟賊勢披靡乃上馬衝擊時噶爾丹率衆幾萬人我軍分隊迎戰自未至酉斬級二千餘賊皆潰奔乘夜追逐三十餘里生擒數百人獲馬駝牛羊廬帳器械無算噶爾丹引數騎遠竄費揚古令阿南達齎疏馳報

御營

召詢其詳阿南達奏曰噶爾丹聞

上親征心膽俱裂且不虞我兵絕其去路突然交戰擒斬  
過半傷斃山谷者相枕藉噶爾丹之妻亦受戮其  
部衆來降者又二千餘人費揚古恐語涉矜張故  
疏內約畧言之

上乃班師留費揚古駐守科圖七月奉

詔由科圖移駐喀爾喀郡王善巴遊牧地甫至噶爾丹潛  
使台吉丹濟拉率千五百人來掠喀爾喀牲畜糗  
糧費揚古遣副都統祖良璧御邵之追擊至翁錦

賊敗適費揚古尋以馬瘦移軍喀喇穆倫會噶爾丹使其宰桑格類固英等來請納款

上再幸塞外

駐蹕棟斯拉

命費揚古馳赴黃河西界

行在入對

諭及昭莫多之戰勢如破竹實為可嘉費揚古奏曰軍中

機務皆遵

上密諭以冀成功西路官兵聞

聖駕先臨克魯倫河無不踴躍奮勉噶爾丹之敗血皆  
睿謨神武震以軍威追之窮蹙所致臣不能生擒以獻罪

也

上曰觀來降台吉等及格類固英之言噶爾丹窮蹙是實  
朕意不忍悉加屠戮欲招降其衆撫而活之費揚古奏

曰

聖意實非臣等愚昧所能測真



天地好生之仁也翼日

賜御佩橐鞬弓矢遣還軍營三十六年正月阿南達自肅  
州奏報哈密回人擒獻噶爾丹之子塞卜騰巴爾  
珠爾等

上以其疏錄示費揚古

賜昨肉鹿尾關東魚等物

諭曰時當上元令節衆蒙古及投誠厄魯特齊集暢春園  
適阿南達疏至衆皆喜悅爾獨居邊塞不得在朕左右

殊深軫念故以阿南達疏示知並賜物問爾無恙即如  
與爾相見也二月

上幸寧夏

詔費揚古密籌進剿噶爾丹費揚古疏請罷大將軍任隨  
領兵將軍出征

上不允所請令便宜調遣兵馬以行

上由黃河西岸

駐蹕達拉布隆

頒賜上駟院馬五十駱駝十費揚古進次薩奇爾巴勒哈  
遜時厄魯特部衆降者相繼丹濟拉亦遣人納款  
言噶爾丹已死欲攜骸骨及其子女並率三百戶  
來歸費揚古以

聞

上回鑾留費揚古駐師察罕諾爾以待丹濟拉六月丹濟  
拉至哈密費揚古有疾

詔昭武將軍馬思喀代統其兵費揚古還京仍任領侍衛

內大臣晉封一等公費揚古以噶爾丹雖死非係  
生擒疏辭封爵得

旨宜遵成命毋固辭

諭大學士等曰塞外情形不可臆度必身歷其境乃有確  
見昔朕欲親征噶爾丹衆皆不欲惟費揚古密抒謀畧  
與朕意合遂悉以西路官兵令其統領進剿道路遼遠  
無乏水草乃全無顧慮直抵昭莫多奮揚軍威俾奸狡  
積寇挫衄大敗累年以來統兵諸將未有能過之者又

諭曰朕屢出征知為將甚難固不可急亦不可緩費揚古  
惟相機調遣緩急合宜是以濟事四十年六月

上幸索約勒濟費揚古扈從中途疾作

上停蹕一日

親往視疾

賜御帳蟒緞鞍馬等物銀五千兩

遣內大臣侍衛等護送還家尋卒

賜祭奠如典禮諡襄壯以其子辰泰襲一等侯兼一雲騎

尉

世宗憲皇帝雍正十年入祀賢良祠

桑格

桑格滿洲正白旗人姓喜塔臘戶部侍郎庫禮之子庫禮以軍功得騎都尉世職又以考滿及遇

恩詔晉一等輕車都尉加一雲騎尉長子堯泰襲旋卒停襲順治十七年更定襲例庫禮之一等輕車都尉加一雲騎尉應世襲桑格由三等侍衛襲父職

聖祖仁皇帝康熙六年以桑格善射擢一等侍衛十年五月授護軍統領十三年三月逆藩耿精忠叛應吳

三桂

上命定南將軍希爾根帥兵赴江西以桑格叅贊軍務八

月奉

諭曰江右為粵東咽喉江浙唇齒所關綦重今兵民之心尚持兩端若不先滅地方小醜大兵難以前進爾當協同將軍領重兵進剿毋使兵力單弱致有疎失時耿精

忠之偽都督易明臨撫州桑格同副都統席布率  
兵規復賊衆四萬餘迎戰擊敗之進薄撫州城賊  
衆自建昌至倚城結壘合城內之賊抗拒桑格同  
席布督兵奮擊克賊壘連敗賊衆賊棄城竄遁追  
剿百餘里復撫州入城駐守十月易明糾賊五萬  
復自建昌來犯桑格乘賊甫渡河擊之賊墮水死  
者無算斬賊將楊三李茂著於陣十一月布爾根  
移師撫州桑格率兵趨剿距城九十里之碣山隘



口斬賊甚衆十四年正月剿賊上高縣斬偽總兵  
朱一曲謝以泰等遂乘勝破賊將阮國棟於新昌  
城北山復二縣城進圍東鄉克之復擊敗賊衆於  
長興鄉連破賊營斬賊將邵連登等易明引賊竄  
遁遂復建昌六月鎮南將軍尼雅翰以廣州兵少  
請

敕桑格率兵赴廣東總統將士守禦

詔以江西賊寇未平令前鋒統領覺羅舒恕移兵前往桑

格仍留授剿十五年二月安親王岳樂統師由袁  
州剿吳三桂賊帥夏國相等於萍鄉桑格合諸軍  
並進破賊十二寨於來龍山夏國相等竄走長沙  
十八年二月隨安親王復長沙

上賜桑格詩有百戰威名早已揚之句八月進征武岡賊  
帥吳國貴馬寶張祖法等踞隘口拒戰桑格偕副  
都統伊巴罕等督兵攻剿越三晝夜以礮擊斃吳  
國貴賊衆悉潰追剿至楓木嶺之木瓜橋十一月

安親王奏令率每佐領下護軍三名還京二十年  
五月

詔以桑格前此出征尚能奮勉回京後委頓不堪解護軍  
統領任以世職隨旗行走三十五年二月

上親征噶爾丹桑格署護軍統領分管鑲白旗大營五月  
師至克魯倫河同內大臣阿密達請追剿逃寇得  
旨俞允分隸左翼軍隨平北大將軍馬思喀追剿至巴顏  
烏蘭西路軍已擊敗噶爾丹於昭莫多會師收集

降衆護送至張家口尋還京

命復護軍統領原品三十八年二月卒子阿柱襲世職



欽定八旗通志卷一百五十九